


# CELEBRACIÓN EN OS COTOS (na casa)

14 – 15 de novembro do 2020

XXXIII DO TEMPO ORDINARIO



NON MÁIS  
VIOLENCIA  
DE XÉNERO



OS COTOS COA IGUALDADE VERDADEIRA DAS PERSOAS,  
COS POBOS QUE SOFREN INJUSTIZA E ABANDONO,  
COS REFUXIADOS E MARXINADOS DA SOCIEDADE,  
COA NATUREZA MALTRATADA  
E CON RESPONSABILIDADE PERSOAL ANTE A COVID-19



## 1.- ENCONTRO EN FAMILIA

### SAÚDO DE BENVIDA

🎵 *Amigos nas penas*

*Celebrante:*

Benvidos sexamos todos a esta celebración. Reunímonos para compartir a fe en familia, e facémolo no nome do Pai e do Fillo e do Espírito Santo.

A semana pasada celebrabamos a fe mirando para a nosa Igrexa Diocesana, comunidade de parroquias. Hoxe Xesús quere que pousemos a mirada en nós mesmos.

A nosa familia está formada por persoas, e cada unha delas ten que ser responsable de si mesma.

Cada un de nós temos unhas calidades que temos que coidar e facer medrar para poñelas ao servizo de todos.

Iso é o que nos mostra Xesús na parábola que nos conta no Evanxeo: a parábola dos talentos.

Non podemos deixarnos levar polo egoísmo nin esconder os nosos valores, senón que temos que facer que dean froitos poñéndoos ao servizo da humanidade para facela máis rica e chea de vida.

Comecemos a celebración atentos á nosa responsabilidade persoal, familiar e social.

## ACTO PENITENCIAL E COMPROMISOS

**Celebrante:** *Deus pon en cada un e en cada unha de nós uns talentos, uns dons, unhas capacidades. Pero moitas veces deixamos que murchen e esmorezan, sen poñelos a render, por iso agora queremos pedir perdón:*

### **Monitor/a**

➤ Pedimos perdón polas veces que nos acomodamos e non poñemos todos os nosos talentos na tarefa de ser familia

### **Señor, ten misericordia de nós**

➤ Pedimos perdón polas veces que nos acomodamos e non poñemos todos os nosos talentos na tarefa de ser comunidade parroquial

### **Señor, ten misericordia de nós**

➤ Pedimos perdón polas veces que nos acomodamos e non poñemos todos os nosos talentos na tarefa de facer realidade o evanxeo de Xesús

### **Señor, ten misericordia de nós**

**Celebrante:** *Deus todopoderoso teña piedade de nós e dos que teñen lugar no noso corazón e nosa vida. A todos o Señor nos conceda o perdón e nos leve á vida eterna. Amén.*

**Celebrante:** *Presentámoslle ao Pai os nosos desexos para cumprir coas nosas responsabilidades con El e cos irmáns. Podemos preguntarnos cal é a tarefa que Deus espera de nós.*

*(silenzo)*

Deus, Noso Pai, cheo de tenrura e misericordia, non hai outra felicidade plena e perpetua senón a de te servir a Ti, creador de todos os bens.

Concédenos vivir sempre alegres no teu servizo, sendo man de irmáns para todos.

Pedímoscho polo mesmo Xesucristo, sabendo como el compartiu no medio de nós, e que vive e reina por sempre eternamente. Amén

## 2.- PROCLAMACIÓN DA PALABRA DE DEUS

*(sentad@s)*

### **Monitor/a:**

*O Libro dos Proverbios pon como modelo á muller que asume con responsabilidade os seus traballos para ser exemplo para todos. A muller dá-nos exemplo.*

*Na parábola dos talentos, Xesús chámá-nos á responsabilidade de coñecer e facer medrar as nosas calidades para que tamén nós poidamos ser exemplo e forza dentro da nosa comunidade.*

## LECTURA DO LIBRO DOS PROVERBIOS

Unha muller xeitosa ¿quen a atopará?:  
o seu valer supera o das perlas.

O seu marido pon nela a confianza  
e non lle han faltar ganancias;  
procúralle felicidade, e non desgraza,  
todos os días da súa vida.

Consegue lá e liño,  
e traballa gustosa coas súas mans;  
bota as mans á roca  
e os seus dedos manexan o fuso.

Tende a palma ao indixente  
e achega as súas mans ao mendigo.

A graza engana e a fermosura esvaece:  
só a muller que teme ao Señor merece ser louvada.  
¡Que falen por ela as obras das súas mans,  
e os seus feitos lle dean honra na praza!

### Palabra do Señor

 *Escoita ao Señor*

*SALMO*

## PROCLAMACIÓN DO SANTO EVANXEO SEGUNDO MATEO

Daquela dilles Xesús aos seus discípulos esta parábola:

-Un home que, tendo que saír de viaxe, chamou polos seus criados e deulle o coidado da súa facenda. A un deulle cinco talentos, a outro dous e a outro un, a cadaquén segundo a súa capacidade; despois marchou.

De seguida, o que recibira cinco talentos foi negociar con eles e gañou outros cinco. Do mesmo xeito o que recibira dous, gañou outros dous. Pero o que recibira un foi cavar un burato na terra e escondeu os cartos do seu amo.

Ao cabo de moito tempo chegou o señor daqueles criados, pedíndolles contas. Chegou o que recibira cinco talentos e presentoulle outros cinco dicindo: "señor, cinco talentos me entregaches, velaquí outros cinco que gañei". Díxolle o señor: "Ben, criado fiel e cumpridor; xa que fuches fiel no pouco, poñereite á fronte do moito: pasa a disfrutar da festa do teu señor".


Chegou o que recibira dous talentos e dixo: "señor, dous talentos me entregaches, velaquí outros dous que gañei". E díxolle o señor: "Ben, criado fiel e cumpridor; xa que fuches fiel no pouco, poñereite á fronte do moito: pasa a disfrutar da festa do teu señor".

Chegou tamén o que recibira un talento e díxolle: "señor, sei moi ben que es un home duro, que colleitas onde non sementaches e recolles onde non botas. Por iso collín medo, e fun agachar na terra o teu talento; aquí tes o que é teu".

Pero o señor respondeulle: "¡Mal criado, lacazán! ¿Conque sabías que seituro onde non semento e recollo onde non boto? Pois, poñías os meus cartos no banco e, así, cando eu volveise, podía coller os cartos e mailos intereses. Así que quitádelle o talento e dádello ao que ten dez. Porque ao que ten, háselle dar e abondo; pero ao que non ten, aínda o que ten se lle ha quitar. E ao criado inútil botádeo fóra á escuridade, onde será o pranto e mailo renxer dos dentes".

### Palabra do Señor

**(sentad@s)** gardamos uns instantes de silencio para acoller a palabra no corazón



A primeira das lecturas de hoxe ten unhas fermosas palabras coas que pon en valor á MULLER, pero tanto na igrexa, como na humanidade actual, non sempre ten nin ocupa o lugar que se merece. Cal é a nosa responsabilidade?:

No evanxeo unha ensinanza **TODOS TEMOS TALENTO E NON PODEMOS DEIXALO ESMORECER.**

Cales son os meus talentos?:

- quizais escoitar, quizais ser optimista, quizais ter soños e esperanzas, quizais aconsellar, ...

(en pé)

## PROFESIÓN DA FE

**Celebrante:** Neste encontro familiar queremos recoñecer os nosos talentos e poñelos ao servizo dos demais, por iso damos resposta coa nosa fe dicindo:

***Creo, Señor, pero aumenta a miña fe***

### ***Monitor/a***

Crede en Deus Pai e Nai,  
que sen facer diferenzas nos enche a todos co talento do seu amor?

***Creo, Señor, pero aumenta a miña fe***

Crede en Xesús,  
que nos convida a ser responsables con nós mesmos, cos demais e coa natureza?

***Creo, Señor, pero aumenta a miña fe***

Crede no Espírito Santo  
que alenta a fuxir das comodidades e que empuxa a colaborar construíndo unha humanidade máis xusta e igualitaria?

***Creo, Señor, pero aumenta a miña fe***

Crede na igrexa,  
comunidade que necesita das nosas mans, dos nosos talentos, para facer realidade o evanxeo no momento que nos toca vivir?

***Creo, Señor, pero aumenta a miña fe***

## ORACIÓN UNIVERSAL

**Celebrante:** Oremos xuntos, con confianza naquel que nos ensina a ser responsables e formar familia sen distinción de persoas. Dicimos:

**Acolle, Señor, a nosa oración**

### ***Monitor/a***

- ✓ Para que cada un, na familia, na parroquia, saibamos recoñecer o noso don particular, e o traballemos para medrar nós mesmos, e para que con nós medren os demais, oremos
- ✓ Para que na Igrexa da casa non enterremos o gran don que Deus nos puxo nas mans, “o evanxeo de Xesús”, oremos
- ✓ Para que sexamos responsables nos traballos que traemos entre mans, e os fagamos de tal xeito que con eles medre a paz, a xustiza e o ben, oremos
- ✓ Para que nunca desprezemos a ninguén por pouco ou pequeno que nos pareza, e saibamos descubrir os dons de cada quen, oremos
- ✓ Polos enfermos e os que están a sufrir as consecuencias económicas da pandemia para que teñan o noso apoio e axuda responsable, oremos

**Celebrante:** Escoita, Señor, a oración que a túa igrexa da casa che presenta con humildade. Pedímoscho por Xesucristo noso Señor. Amén

### 3.- OS SIGNOS DA COMUNIÓN CON DEUS EN FAMILIA

#### NOSO PAI

**Celebrante:** *A Deus Pai presentámoslle agora a nosa oración como nos ensinou Xesús, por iso en familia lle dicimos:*

*NOSO PAI ...*

#### SIGNO DA PAZ

**Celebrante:** *Nestes momentos de pandemia non podemos medrar se o único que facemos e mirar o noso dereito de liberdade. Todos temos talento para mirar polos demais, temos talento para poñernos no lugar dos outros. Non importa se se é home ou muller, rico ou pobre, de aquí ou de alá, ... Todos temos talentos, pero non serven de nada se os enterramos.*

#### NON COMULGAMOS PERO ESTAMOS EN COMUNIÓN

**Celebrante:** *A fe que compartimos amósanos que Xesús nos ofrece o mellor que ten, a súa vida. Participemos hoxe nesta casa tratando de poñer os nosos talentos ao servizo da familia. Sintámonos ditosos por estar convidados a facer crible o Evanxeo.*

 *O pouco que Deus nos dá*

### 4.- AVISOS E DESPEDIDA

#### ORACIÓN FINAL

#### **Celebrante:**

Oremos: Señor, dámosche as grazas porque hoxe, como familia, podemos compartir os froitos da nosa fe.

Suplicámosche humildemente que esta celebración na que facemos memoria da vida do teu Fillo, nos faga medrar no teu amor.

Pedímoscho a Ti que vive e reina con nós por sempre eternamente. Amén

*Recordando as palabras da lectura de hoxe, todos temos a responsabilidade de ter un trato acolledor, xusto e digno con todas as mulleres.*

*Con Xesús queremos dar froito aos nosos talentos pois será o mellor xeito de ser crentes, e será o mellor xeito de facer crible o evanxeo.*

*Con Xesús, na nosa comunidade de Os Cotos, queremos poñer da nosa parte o seguir dando froitos pois é un talento que non podemos enterrar.*

*Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.*



Seguro que todos sabemos como poñerlle cor á vida.

Se sabemos e non o facemos  
somos uns covardes.

Se sabemos pero miramos para outro lado  
somos uns acomodados.

Se sabemos pero facemos como se non soubéramos  
somos uns hipócritas.

Todos temos TALENTOS, fagámolos cribles



¡Señor, cinco talentos me deches,  
para que con eles dea froitos!"

*Fagamos as cousas ben e con responsabilidade  
para que o Señor nos recoñeza nos nosos feitos.*

Con Cristo  
inviados

